

PROXECTO DE DECRETO POLO QUE SE ESTABLECE A ORDENACIÓN DOS CAMPAMENTOS DE TURISMO

De conformidade co disposto no artigo 27.21 do Estatuto de autonomía, a Comunidade Autónoma de Galicia ten atribuída a competencia en materia de promoción e ordenación do turismo no seu ámbito territorial.

A Lei 7/2011, do 27 de outubro, do turismo de Galicia, enumera no seu artigo 55 os tipos de establecementos de aloxamento turístico, entre os que se atopan os campamentos de turismo. O artigo 66 da lei define os campamentos de turismo e dispón que a dotación de instalación e servizos estableceranse regulamentariamente.

Este decreto ten por obxecto establecer unha regulación do aloxamento temporal na modalidade de campamentos de turismo ou cámpings.

En relación cos campamentos de turismo ou cámpings, Galicia conta xa co Decreto 144/2013, do 5 de setembro, polo que se establece a ordenación dos campamentos de turismo de Galicia, que desenvolve a vixente Lei 7/2011, do 27 de outubro, do turismo de Galicia, de forma que o que se pretende coa regulación contida neste decreto é mellorar aqueles aspectos que se demostren necesitados dunha revisión ou reconsideración.

En canto á regulación dos campamentos de turismo, as principais novidades que se introducen no decreto son:

1. En uso da remisión contida no artigo 66.3 da Lei 7/2011, do 27 de outubro, procédese a fixar unha clasificación en cinco categorías, que se identificarán con estrelas, e que recolle unha tendencia xeneralizada para este tipo de establecementos tanto noutras comunidades autónomas como na Unión Europea.

Fíxase un réxime transitorio para o paso do actual sistema, no que se prevén tres categorías, ao novo, con cinco.

Así mesmo, optouse por fixar os requisitos de clasificación en función do número de prazas e non de parcelas. De este xeito, considéranse que os servizos do cámping estarán mellor dimensionados en relación co número de usuarios do mesmo, ao ser unha correspondencia máis exacta.

2. Elimínase a esixencia de inscrición da autorización de uso para campamento de turismo no Rexistro da Propiedade, considerando que a dita esixencia pode supoñer unha barreira inxustificada á libre prestación de servizos, á luz da Lei 17/2009, do 23 de novembro, sobre libre acceso ás actividades e servizos e o seu exercicio, de transposición da Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior e, así mesmo, tendo en conta o Acordo de 19 de xullo de 2012, da Comisión Bilateral de Cooperación Administrativa Xeral do Estado-Comunidade Autónoma de Galicia, en relación coa Lei 7/2011, do outubro, do turismo de Galicia.

3. Introdúcese a posibilidade de que as instalacións estables nos campamentos de turismo poidan ser explotadas directa ou indirectamente polos titulares daqueles, abrindo de este xeito a porta a novas formas de explotación comercial, como son os tour operadores, xa plenamente consolidadas noutros

ámbitos turísticos. Neste senso tívose tamén en conta a necesidade de respectar as esixencias legais de libre acceso á prestación de servizos e actividades.

4. Trátase de delimitar da forma máis precisa posible cando nos atopemos ante modificacións de carácter substancial ou non, nos termos previstos nos artigos 42 e 43 da Lei 7/2011, do 27 de outubro. A estes efectos, consideraranse cambios substanciais os que “afecten” á clasificación turística, é dicir, que a realización do cambio determinará a necesidade de cambiar a clasificación turística do campamento de turismo. No resto dos casos, os cambios consideraranse como non substanciais. As primeiras darán lugar á necesidade de tramitar e obter a correspondente autorización. Nas segundas bastará coa comunicación á Área Provincial da Axencia Turismo de Galicia que corresponda.

5. Mantense a regulación dos campamentos de turismo con distintivo verde, contida no Decreto 144/2013, do 5 de setembro, e engádesse a posibilidade doutros distintivos en razón da especialización temática do campamento de turismo. As especialidades que se recoñecen son: campamento de turismo verde, campamento de turismo temático e campamentos para caravanas e autocaravanas.

6. En canto ao réxime transitorio, os campamentos en funcionamento poderán continuar en activo nas condicións nas que estean autorizados, sen prexuízo da súa reclasificación conforme ás categorías establecidas neste decreto. A obriga de adaptarse á nova normativa xurdirá no momento en que pretendan un cambio de categoría. Neste caso, contempla a posibilidade de que soliciten a dispensa do cumprimento dalgún ou dalgúns dos requisitos legalmente esixidos, sempre que se acredite a imposibilidade ou dificultade extrema de cumprilos, así como se propoñan medidas compensatorias.

Este decreto consta de trinta e seis artigos, estruturados en seis capítulos, tres disposicións adicionais, tres disposicións transitorias, unha disposición derogatoria e dúas disposicións finais.

O capítulo I, baixo a rúbrica “Disposicións xerais”, regula o obxecto, ámbito de aplicación do decreto, o concepto de campamento e os distintivos.

O capítulo II establece os requisitos xerais, de instalacións, equipamentos e servizos que, con independencia da súa categoría, deben cumprir todos os campamentos de turismo.

O capítulo III regula o réxime de autorización dos campamentos de turismo.

O capítulo IV ocúpase do funcionamento.

O capítulo V dispón a clasificación dos campamentos en cinco categorías por estrelas, e as especialidades: campamentos de turismo verde, campamentos de turismo temático, e campamentos para caravanas e autocaravanas.

Finalmente, no capítulo VI regulase o réxime sancionador.

As disposicións adicionais primeira, segunda e terceira refírense, respectivamente, ao tratamento dos datos de carácter persoal por parte da Axencia, á modificación dos formularios co fin de mantelos actualizados de conformidade coa normativa vixente, e aos modelos normalizados dos trámites máis comunmente utilizados na tramitación administrativa a disposición das persoas interesadas.

As disposicións transitorias establecen a posibilidade de que os campamentos autorizados á entrada en vigor deste decreto poidan continuar funcionando sen adaptarse ao mesmo, salvo no relativo á seguridade. Non obstante, establécese que dentro do prazo de cinco anos deberán axustarse ás categorías establecidas no decreto, contemplando a posibilidade de pedir dispensa daquelas condicións que resulten de imposible cumprimento.

O decreto someteuse ao preceptivo informe do Consello do Turismo de Galicia, así como á consulta das organizacións máis representativas do sector e do Consello Galego de Consumidores e Usuarios.

Na súa virtude, por proposta do Vicepresidente e Conselleiro da Presidencia, Administracións Públicas e Xustiza, de acordo co Consello Consultivo e tras a deliberación do Consello da Xunta, na súa reunión do día

DISPOÑO

CAPÍTULO I

Disposicións Xerais

Artigo 1. Obxecto e ámbito de aplicación

1. Este decreto ten por obxecto a ordenación dos establecementos turísticos de aloxamento na modalidade de campamento de turismo ou cámping aos que se refire o artigo 66 da Lei 7/2011, do 27 de outubro, do turismo de Galicia, no ámbito da Comunidade Autónoma de Galicia.
2. Quedan excluídos do ámbito de aplicación deste decreto os aloxamentos aos que se refire o artigo 53, apartados 2 e 3 da Lei 7/2011, do 27 de outubro; os campamento xuvenís, albergues, centros e colonias de vacacións escolares, as áreas provisionais de acampada por eventos culturais, recreativos ou deportivos, así como toda clase de acampadas que estean reguladas polas súas normas específicas.

Artigo 2. Concepto

1. Considérase campamento de turismo o establecemento de aloxamento turístico que, ocupando un espazo de terreo debidamente delimitado e dotado das instalacións e servizos que se establezan regulamentariamente, estea destinado a facilitar a estancia temporal en tendas de campaña, caravanas, autocaravanas ou calquera outro elemento semellante facilmente transportable, así como doutras instalacións estables destinadas ao aloxamento temporal que sexan explotadas polo mesmo titular do campamento.
2. Enténdese por instalacións estables, destinadas a aloxamento temporal, as instalacións de elementos fixos prefabricados de madeira ou similares tipo cabana, bungaló ou outros elementos transportables e/ou desmontables, sempre que se trate de edificacións independentes ou pareadas, de planta baixa.

Artigo 3. *Distintivos*

1. En todos os campamentos será obrigatoria a exhibición, ao pé da entrada principal, dunha placa normalizada, na que figurará o distintivo correspondente á clase de establecemento de aloxamento turístico, a súa categoría e, no seu caso, especialidade.
2. O distintivo deberá ser exhibido tamén na entrada da recepción do campamento e terá que figurar, de forma destacada, con semellante grafismo e nas dimensións que resulten adecuadas en cada caso, nos xustificantes de pago e en calquera outro material impreso, incluída a propaganda que utilice a empresa.
3. As características e dimensións das placas identificativas son as que figuran no anexo II deste regulamento.

CAPÍTULO II

Requisitos xerais dos campamentos de turismo

Artigo 4. *Requisitos xerais*

1. Todos os campamentos de turismo, con independencia da súa categoría, deben cumprir os requisitos de instalacións, equipamentos e servizos que se establecen neste capítulo.
2. Con carácter xeral, deberán cumprir as obrigas que se deriven das disposicións vixentes en materia de accesos, accesibilidade, construción e edificación, instalación e funcionamento de maquinaria, protección e prevención contra incendios forestais, inundacións, contaminación acústica e calquera outra normativa que lles sexa de aplicación, e deberán procurar a integración co medio natural.

Artigo 5. *Superficie e capacidade*

1. Os campamentos de turismo terán que situarse en unha ou varias parcelas contiguas entre si onde se sitúen a totalidade dos servizos comúns e con acceso a eles.
2. Da superficie total do campamento de turismo poderá destinarse ata un máximo do 75% a zona de acampada e a superficie restante destinarase a viarios interiores, zonas verdes, deportivas e outros servizos de uso común.
3. A capacidade do campamento de turismo virá determinada polo número de prazas asignado, que deberá respectar, en todo caso, a superficie mínima por persoa en función da categorías do establecemento que se establece no anexo I deste decreto.

Artigo 6. Zona de acampada

1. Enténdese por zona de acampada o conxunto das parcelas existentes nas zonas de aloxamento en que se divide a superficie do campamento de turismo.
2. Dentro da zona de acampada permitiranse os seguintes usos:
 - a) A estancia en tendas de campaña, caravanas, autocaravanas e calquera elemento semellante e facilmente transportable.
 - b) A estancia temporal en instalacións estables.
3. A superficie da zona de acampada estará dividida en parcelas de terreo destinadas á instalación de tendas de campaña, caravanas, autocaravanas e outros elementos semellantes facilmente transportables, ás instalacións estables destinadas ao aloxamento temporal e ao estacionamento dun vehículo por parcela. Cada parcela terá convenientemente sinalizadas, mediante fitos, marcas ou separacións vexetais, os seus límites e o número que lle corresponda.

As instalacións estables tipo bungaló ou “móbil home” deberán contar polo menos con conexión de subministración eléctrica e toma de auga apta para o consumo humano. A capacidade das instalacións estables non poderá ser inferior a 6 metros cadrados por praza e un máximo de 8 prazas. Deberán contar, ademais, con aseo propio e ventilación directa.

No caso de instalacións estables distintas das anteriores como cabanas nas árbores, flotantes e, en xeral, aquelas que non encaixen na tipoloxía de bungaló, as dotacións de servizos e espazo esixirase motivadamente atendendo a súas circunstancias concretas.

4. Non obstante o sinalado no apartado anterior, poderase permitir, a solicitude do interesado, que se deixe sen parcelar ata un 20% da superficie da zona de acampada. Nesta zona unicamente se permitirá a ocupación de pequenas tendas de campaña garantindo, en todo caso, unha ratio mínima de 12 metros cadrados por campista e deberá estar debidamente sinalizada e identificada respecto ao resto da zona de acampada.

Enténdese por pequenas tendas de campaña aquelas cunha capacidade non superior a catro persoas.

5. A ordenación do campamento de turismo deberá preverse de forma tal que cada un dos usos antes sinalados se sitúe en zonas diferenciadas, debidamente separadas e identificadas.
6. A zona de estacionamento de vehículos poderá dispoñerse en lugar distinto á prevista para o aloxamento. En tal caso, a dita zona deberá estar individualizada e deberá identificarse o número de parcela de acampada a que corresponda.

7. Nos campamentos aos que non é posible o acceso en vehículos debido ás condicións xeográficas ou limitacións medioambientais, así como aqueles nos que estea restrinxido con carácter permanente o citado acceso por normativa vixente, as parcelas non terán que contar coa previsión de superficie reservada para o estacionamento de vehículos.

Artigo 7. Limitacións á disposición de parcelas e instalacións estables destinadas ao aloxamento temporal

1. Prohíbense, nos campamentos de turismo, a venda ou aluguer de parcelas e instalacións estables destinadas ao aloxamento temporal. Terminado o período da estancia, as parcelas deben quedar desaloxadas totalmente, salvo no que respecta ás instalacións estables, que poderán permanecer nas parcelas, pero sen ocupantes.
2. Non obstante a prohibición anterior, a comercialización e promoción das zonas destinadas a instalacións estables poderá facerse a través de empresas de intermediación. O titular do campamento de turismo deberá acreditar, en todo caso, a dispoñibilidade das instalacións estables e será o responsable fronte aos usuarios do cumprimento das condicións establecidas neste decreto e na normativa turística, sen prexuízo doutras responsabilidades concorrentes que poidan existir.

Artigo 8. Valado

1. Os campamentos de turismo deberán estar pechados en todo o seu perímetro.
2. Nos peches empregarase materiais e cores que permitan unha integración harmónica co contorno e a paisaxe, dándose preferencia a sebes ou outras pantallas vexetais.

Artigo 9. Accesos e viarios interiores

1. Tanto os accesos como os viarios interiores do campamento de turismo deberán ter as condicións e dimensións adecuadas para o tránsito con seguridade de vehículos e peóns e garantir as debidas condicións de accesibilidade e, como mínimo, un ancho de 3,5 metros os dun só sentido de circulación de vehículos e 6 metros os de dobre sentido.
2. En todo caso, deberán ter as condicións adecuadas para o acceso de servizos de emerxencia.

Artigo 10. Sistema de seguridade e protección

1. Todos os campamentos de turismo deberán dispor das medidas e instalacións de prevención, protección e seguridade para casos de incendio, asolagamento e outras emerxencias previstas na normativa vixente.

A estes efectos, todos os campamentos de turismo deberán contar cun plan de seguridade, saúde e autoprotección.

2. Se o campamento de turismo estivese pola súa capacidade dentro do ámbito da normativa vixente reguladora da esixencia de redacción de Norma Básica de Autoproteccións, deberá dispoñer de dito plan nos termos establecidos na lexislación vixente.
3. En todo caso deberán garantirse, como mínimo as seguintes medidas de seguridade:
 - a) Extintores de po antibrasa de seis quilómetros de capacidade, en número de un por cada vinte parcelas ou fracción, situados en lugares visibles de fácil acceso e a unha distancia máxima de 40 metros entre eles.
 - b) Luces de emerxencia nos lugares previstos para a saída de persoas ou vehículos en caso de incendio, así como en todos os lugares de uso común.
 - c) Existencia na recepción do campamento e nun lugar ben visible dun plano do terreo con indicación dos lugares nos que estean os extintores e as saídas, acompañado do seguinte aviso escrito en galego, castelán e inglés: situación dos extintores e saídas para caso de incendio.
 - d) Nos campamentos de turismo situados en zoas forestais deberán cumprirse as disposicións que diten os organismos competentes para a prevención de incendios forestais.
 - e) No caso de que no campamento se autorice preparar alimentos á grella, deberá delimitarse unha zona para elas, especificando as distancias mínimas ás parcelas do campamento.
 - f) A apertura de todas as portas de utilización, no caso de incendio, deberá ser en sentido de saída ou ben en dobre sentido.
 - g) A almacenaxe de materiais líquidos, especialmente de botellas de gas, non se poderá efectuar sen as correspondentes instalacións de seguridade, conforme á normativa específica sobre a materia.
 - h) Os traballos que se deban realizar e poidan supoñer riscos de incendio, sobre todo o transporte de materiais inflamables e a soldadura, requirirán a previa autorización expresa, por escrito, da persoa titular do establecemento, quen tomará as medidas de precaución adecuadas a cada caso.
 - i) O persoal do campamento de turismo deberá coñecer o uso dos extintores e realizar, como mínimo unha vez ao ano, ao comezo da tempada, exercicios prácticos de extinción de incendios.

- j) Garantir a dispoñibilidade de auga para o suposto de emerxencia acorde á capacidade e características do campamento de turismo.
- 4. Os campamentos de turismo deberán presentar ao inicio de cada tempada turística unha certificación subscrita por técnico competente da vixencia e cumprimento dos plans e medidas de seguridade, saúde e autoprotección a que se refire este precepto.

Artigo 11. *Instalacións e servizos*

Os campamentos de turismo deberán dispoñer das seguintes instalacións e servizos:

- 1. Instalación eléctrica
- 2. Subministro de auga
- 3. Tratamento e evacuación de augas residuais
- 4. Tratamento e recollida de lixos

Artigo 12. *Instalación eléctrica*

- 1. A capacidade de subministro eléctrico determinarase, despois do informe do organismo competente, en función das parcelas con toma de corrente, das instalacións e de todos os servizos cos que conte o campamento, segundo o anteproxecto das obras. En todo caso, deberase garantir unha capacidade mínima de 660 vatios por parcela e día.
- 2. O campamento de turismo disporá de un sistema de alumeado de emerxencia que deberá abarcar, como mínimo, as instalacións e locais de uso común, as vías de evacuación e accesos do campamento de turismo e as vías de paso común.
- 3. O campamento de turismo contará cun sistema de alumeado nocturno en lugares estratéxicos como os acesos, servizos comúns, recepción ou outros análogos que permita o tránsito polo campamento de turismo sen entorpecer o normal descanso dos campistas.
- 4. A rede de distribución interior deberá estar soterrada prohibíndose os tendidos aéreos.
- 5. O proxecto de instalación eléctrica do campamento de turismo deberá contar coa inscrición correspondente na consellería competente en materia de industria.

Artigo 13. *Subministro de auga*

- 1. O subministro de auga potable ao campamento de turismo deberá efectuarse mediante enganche ás redes xerais existentes. De non existir tal posibilidade, poderase realizar mediante o recurso a pozos ou mananciais de acordo coa lexislación en materia de augas.

En caso de que non exista posibilidade de enganche á rede xeral existente, o campamento de turismo deberá dispor de uns depósitos de reserva que garantan o subministro de auga durante tres días.

2. No caso de subministro de auga potable mediante pozos ou mananciais, o titular do establecemento deberá acreditar a súa potabilidade na forma establecida pola normativa vixente e, como mínimo, unha vez ao ano e antes do inicio da tempada turística, mediante certificado expedido por un laboratorio público ou privado, acreditado ou certificado, que especifique que a auga no punto de entrega ao consumidor ou usuario é apta para o consumo humano. A dita acreditación deberase presentar na Área Provincial correspondente da Axencia de Turismo de Galicia.

Os puntos de subministro e/ou fontes de auga potable deberán estar debidamente sinalizados mediante os correspondentes rótulos, polo menos, en galego, castelán e inglés.

3. No caso de uso de augas non aptas para o consumo humano destinadas a outros usos, os puntos de utilización das ditas augas deberán estar debidamente sinalizados tanto coa correspondente simbología como textualmente.

Artigo 14. *Tratamento e evacuación de augas residuais*

O tratamento e evacuación de augas residuais do campamento de turismo deberá efectuarse mediante enganche ás redes xerais existentes. De non existir tal posibilidade deberase instalar un sistema de depuración propio que cumpra coa normativa vixente na materia e que conte coas perceptivas autorizacións de vertidos, no seu caso.

Artigo 15. *Tratamento e recollida de lixo*

1. Os campamentos de turismo deberán contar cos colectores necesarios para efectuar a recollida selectiva de lixo na forma prevista nas ordenanzas municipais do concello respectivo ou, no seu defecto, no sistema previsto para esa zona polo Plan de xestión de residuos urbanos de Galicia.
2. Os colectores situaranse en lugar non visible e nunha localización o máis afastada posible da zona de acampada.

CAPITULO III

Réxime de autorización dos campamentos de turismo

Artigo 16. *Forma de presentación das solicitudes e comunicacións e documentación*

1. As solicitudes, comunicacións e declaracións responsables reguladas neste decreto presentaranse preferiblemente pola vía electrónica a través do formulario normalizado dispoñible na sede electrónica da Xunta de Galicia, <https://sede.xunta.gal>.

A presentación electrónica será obrigatoria para as persoas xurídicas, as entidades sen personalidade xurídica, as persoas que exerzan unha actividade profesional para a que se requira colexiación obrigatoria para os trámites e actuacións que realicen coas

Administracións públicas no exercicio da súa actividade profesional, e para as persoas que representen a unha persoa interesada obrigada á presentación electrónica.

Se algunha das persoas interesadas obrigadas á presentación electrónica presenta a súa solicitude presencialmente, solicitaráselle que a emende a través da súa presentación electrónica. Para estes efectos, considerarase como data de presentación da solicitude aquela na que fora realizada a emenda.

Para a presentación das solicitudes poderá utilizarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e chave Chave365 (<https://sede.xunta.es/chave365>).

Aquelas persoas non obrigadas á presentación electrónica, opcionalmente, poderá presentar as solicitudes presencialmente en calquera dos lugares e rexistros establecidos na normativa reguladora do procedemento administrativo común, utilizando o formulario normalizado dispoñible na sede electrónica da Xunta de Galicia.

2. A documentación complementaria presentarse preferiblemente por vía electrónica. As persoas interesadas responsabilizaranse da veracidade dos documentos que presenten. Excepcionalmente, a Administración poderá requirir a exhibición do documento orixinal para o cotexo da copia electrónica presentada.

A presentación electrónica será obrigatoria para os suxeitos obrigados á presentación electrónica da solicitude. Se algunha das persoas interesadas presenta a documentación complementaria presencialmente, solicitaráselle que a emende a través da súa presentación electrónica. Para estes efectos, considerarase como data da presentación aquela na que fora realizada a emenda.

Aquelas persoas non obrigadas á presentación electrónica, opcionalmente, poderán presentar a documentación complementaria presencialmente en calquera dos lugares e rexistros establecidos na normativa reguladora do procedemento administrativo común.

3. Sempre que se realice a presentación de documentos separadamente da solicitude deberase indicar o código e o órgano responsable do procedemento, o número de rexistro de entrada da solicitude e o número de expediente, se se dispón del.
4. No caso de que algún dos documentos que se van presentar de forma electrónica superase os tamaños máximos establecidos ou tivese un formato non admitido pola sede electrónica da Xunta de Galicia, permitirase a presentación deste de forma presencial dentro dos prazos previstos e na forma indicada no parágrafo anterior. A información actualizada sobre o tamaño máximo e os formatos admitidos pode consultarse na sede electrónica da Xunta de Galicia.

Artigo 17. *Notificacións*

1. As notificacións de resolucións e actos administrativos practicaranse, preferentemente, por medios electrónicos e, en todo caso, cando as persoas interesadas resulten obrigadas a recibilas por esta vía. As persoas interesadas que non estean obrigadas a recibir notificacións

electrónicas poderán decidir e comunicar, en calquera momento, que as notificacións sucesivas se practiquen o deixen de practicar por medios electrónicos.

2. As notificacións electrónicas realizaranse mediante o Sistema de Notificación Electrónica de Galicia – Notifica.gal, dispoñible a través da sede electrónica da Xunta de Galicia (<https://sede.xunta.gal>). Este sistema remitirá ás persoas interesadas avisos da posta a disposición das notificacións ao dispositivo electrónico e/ou ao enderezo de correo electrónico que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.
3. A persoa interesada deberá manifestar expresamente a modalidade escollida para a notificación (electrónica ou papel). No caso de que persoas interesadas obrigadas a recibir notificacións só por medios electrónicos deberán optar, en todo caso, pola notificación por medios electrónicos, sen que sexa válida, ni produza efectos no procedemento, unha opción diferente.
4. As notificacións por medios electrónicos entenderanse practicadas no momento no que se produza o acceso ao seu contido. Cando a notificación por medios electrónicos sexa de carácter obrigatorio, ou fora expresamente escollida polo interesado, entenderase rexeitada cando transcorran dez días naturais dende a posta a disposición da notificación sen que se acceda ao seu contido.
5. Se o envío da notificación electrónica non fora posible por problemas técnicos, a Administración xeral e do sector público autonómico de Galicia practicará a notificación polo medios previstos na normativa reguladora do procedemento administrativo común.

Artigo 18. *Informe potestativo previo*

1. Quen proxecte instalar un campamento de turismo, antes de iniciar calquera tipo de actuación ou trámite ante o concello correspondente, poderá solicitar da Área Provincial da Axencia de Turismo de Galicia na que radique o establecemento un informe relativo ao cumprimento dos requisitos mínimos de infraestrutura e servizos, utilizando o modelo normalizado que figura no anexo III, que será emitido no prazo máximo de dous meses.

O informe limitarase a indicar se a proposta é autorizable como campamento de turismo na categoría máis baixa. Ademais, indicará se o mesmo cumpre para a súa clasificación nunha categoría determinada se o solicitante así o pedira expresamente na súa solicitude.

A validez do informe será dun ano sempre que permaneza en vigor a normativa turística respecto a que se emitira o informe.

2. A solicitude de informe potestativo previo deberase acompañar, como mínimo, da seguinte documentación:

- a) Plano de situación do campamento a escala 1:2.000, sinalando as vías de comunicación, tipos de edificacións nos arredores, distancia aos núcleos habitados máis próximos e accidentes topográficos máis importantes.
 - b) Plano do campamento a escala 1:500, no que figure a situación das diferentes instalacións, edificacións, vías e superficies debidamente delimitadas e reservadas para zonas de acampada, marcando as correspondentes parcelas e espazos verdes.
 - c) Plano de planta dos diferentes edificios e instalacións estables destinadas a aloxamento temporal, a escala 1:100.
 - d) Memoria asinada por facultativo competente na que se fagan constar os requisitos técnicos dos que dispón o campamento, a idoneidade da localización, certificando que non está afectado por prohibicións ou limitacións de uso que impiden o emprazamento; as instalacións e servizos do establecemento, o cumprimento da normativa vixente en materia de accesibilidade, incendios, asolagamento e ordenación urbanística, así como calquera outra que resulte de aplicación.
3. Do mesmo xeito, na tramitación das perceptivas licenzas municipais, o concello correspondente poderá solicitar o dito informe á Área Provincial da Axencia de Turismo de Galicia que corresponda.
4. En ningún caso este informe será suficiente para a apertura do campamento de turismo, debendo contar con autorización de apertura e clasificación turística segundo o disposto neste decreto.

Artigo 19. *Solicitud de autorización de apertura e clasificación turística*

- 1. É requisito previo para o inicio e desenvolvemento da actividade de campamento de turismo, en calquera das categorías previstas legalmente, a obtención da autorización de apertura e clasificación turística outorgada pola Axencia Turismo de Galicia.
- 2. A solicitude de autorización de apertura deberá conter, polo menos, a seguinte documentación e información:
 - a) No caso de actuar a través do representante deberase acompañar a documentación acreditativa da suficiencia do poder co que se actúa.

Se a titularidade do establecemento corresponde a unha persoa xurídica, escritura de constitución da sociedade e poderes do solicitante para o caso de que non se deduza claramente da escritura social.

- b) Documentación acreditativa da dispoñibilidade dos terreos sobre os que se proxecta o campamento de turismo e, no seu caso, das instalacións estables.

- c) Certificado expedido por un laboratorio público ou privado, que estea acreditado ou certificado, de que a auga no punto de entrega ao consumidor é apta para o seu consumo, cando se prevea o uso de auga distinta á procedente da rede de abastecemento municipal.
- d) Documento que acredite a subscrición dun seguro de responsabilidade civil nos termos previstos neste decreto.
- e) Proxecto técnico asinado por facultativo competente, con planos e memoria que será o mesmo proxecto que o presentado ante o concello para a obtención da licenza ou título administrativo habilitante, e no que se identificarán expresamente as zonas e parcelas.
- f) Relación das parcelas numeradas con indicación das súas características, capacidade e superficies respectivas.
- g) Título administrativo habilitante do concello e autorizacións sectoriais que, no seu caso, sexan perceptivas.

Artigo 20. *Procedemento e resolución de apertura e clasificación turística*

1. O expediente de autorización de apertura e clasificación turística iniciárase por solicitude presentada pola persoa interesada seguindo o modelo normalizado que figura no anexo IV, debendo indicar o período de funcionamento para o que se solicita a autorización.
2. O expediente instruírase pola Área Provincial da Axencia de Turismo de Galicia na que radique o establecemento. Unha vez instruído o expediente elevarase á Dirección da Axencia de Turismo de Galicia para que dite a resolución procedente.
3. Na instrución do expediente deberá solicitarse o informe da Inspección de Turismo e garantirase, en todo caso, o trámite de audiencia á persoa interesada, de conformidade co disposto na normativa reguladora do procedemento administrativo común.
4. O prazo para instruír e resolver o expediente será de tres meses contados dende a entrada da documentación completa no rexistro do órgano competente para a súa tramitación. Transcorrido o dito prazo sen que se produza a notificación da resolución expresa, a persoa interesada poderá entender estimada a súa solicitude.
5. A autorización e clasificación turística é independente doutras que deban ser concedidas por outros órganos administrativos, en virtude das súas respectivas competencias.
6. O procedemento axustarase ao disposto neste decreto e á normativa sobre procedemento administrativo común.

Artigo 21. *Clasificacións e modificacións*

1. Os campamentos de turismo deberán manter desde o momento da súa autorización as condicións que determinaron a mesma e a súa clasificación nunha categoría determinada.
2. Calquera modificación que afecte ás condicións nas que se outorgou a autorización de apertura e clasificación do campamento de turismo deberá ser comunicada á Área Provincial da Axencia de Turismo de Galicia competente, acompañada da documentación correspondente que permita coñecer o alcance e incidencia da modificación na actividade autorizada e na clasificación, e xustifique que a mesma cumpre coa normativa aplicable.
3. Se a modificación determinase o cambio de clasificación turística, considerarase que ten carácter de substancial e requirirá da autorización expresa da Dirección da Axencia de Turismo de Galicia, tramitada conforme ao procedemento previsto para a autorización de apertura e clasificación do campamento de turismo. A documentación requirida virá determinada polo propio contido da modificación substancial que se pretenda.
4. No resto dos casos, a modificación considerarase como non substancial e bastará coa presentación dunha comunicación previa xustificativa de cambios ante a Área Provincial correspondente da Axencia de Turismo de Galicia.

Artigo 22. *Dispensas*

1. Non obstante a esixencia xeral para todos os campamentos de turismo de cumprir cos requisitos fixados neste decreto para a súa autorización e clasificación, poderase dispensar do cumprimento dos requisitos relativos a:
 - a) Disposición de conexión a internet nos casos de campamentos de turismo emprazados en lugares onde non exista ningunha cobertura que permita a prestación do servizo.
 - b) Reservas de espazo para prazas de aparcamento cando pola súa situación non sexa posible o acceso de vehículos, xa sexa por razóns legais ou de feito.
 - c) No caso de campamentos de turismo situados en illas ou espazos naturais declarados como tales, aqueles requisitos cuxo cumprimento non sexa posible por razón da insularidade.
2. En ningún caso se poderá dispensar do cumprimento daqueles requisitos que afecten á seguridade ou salubridade.
3. A solicitude de dispensa, que irá xunta á de autorización cando se refira a un campamento de nova apertura, deberá concretar o requisito ou requisitos respecto dos que se solicita a dispensa, as circunstancias que imposibilitan o seu cumprimento e as medidas compensatorias que se proxectan.

4. O procedemento para a concesión da dispensa será o mesmo que o previsto para a autorización dos campamentos de turismo. A resolución que acorde conceder ou non a dispensa deberá ser motivada e previo informe técnico.

Artigo 23. *Cese da actividade*

1. O cese da actividade a instancias do titular do campamento turístico requirirá unicamente da comunicación a Área Provincial correspondente da Axencia de Turismo de Galicia.
2. Se o interesado incumprise co seu deber de comunicar o cese da actividade, a mesma declararase de oficio por resolución da Dirección da Axencia de Turismo de Galicia, previa tramitación do oportuno expediente con audiencia da persoa interesada, sen prexuízo das responsabilidades de tipo sancionador a que poida dar lugar a omisión de tal deber.

Artigo 24. *Inscripción no rexistro de empresas e actividades turísticas*

1. Os campamentos de turismo autorizados inscribíranse no Rexistro de Empresas e Actividades Turísticas da Comunidade Autónoma de Galicia previsto no artigo 50 da Lei 7/2011, do 27 de outubro, do turismo de Galicia.
2. A dita inscrición cancelárase polo cese da actividade turística.

CAPÍTULO IV

Funcionamento dos campamentos de turismo

Artigo 25. *Carácter público*

Os campamentos de turismo teñen o carácter de establecementos públicos, se ben o acceso poderá condicionarse ao cumprimento das normas ou regulamento de réxime interno que determine o propio campamento de turismo.

Artigo 26. *Regulamento de réxime interno*

1. O regulamento de réxime interno é o conxunto de normas fixadas pola dirección do campamento de turismo que teñen por obxecto establecer as condicións de admisión e, no seu caso, expulsión; as normas de convivencia e funcionamento regulando, entre outros, o posible uso de lume, a presenza de animais de compañía e a recollida de residuos; o réxime da permanencia e uso das instalacións por persoas non aloxadas no campamento de turismo; o período e o horario de apertura dos servizos de restauración e tendas do campamento de turismo así como, en xeral, todos aqueles aspectos que permitan o mellor desenvolvemento da actividade de acampada e do uso dos servizos do campamento.
2. As ditas normas non poderán dar lugar, en ningún caso, a discriminación prohibida legalmente nin contravir o ordenamento xurídico vixente, e deberán cumprir coa normativa vixente en materia de prezos e reservas.

3. O regulamento de réxime interno deberá estar a disposición de todos os usuarios nun lugar accesible e visible e, polo menos, na recepción do campamento de turismo.

Artigo 27. *Período de funcionamento*

1. O titular do campamento de turismo deberá comunicar á Área Provincial correspondente o período de funcionamento, así como calquera cambio que se produza nel.
2. Fóra do período de funcionamento debidamente comunicado, o campamento de turismo non poderá desenvolver ningunha actividade de campamento. Poderá, non obstante, prestar un servizo exclusivamente de depósito de caravanas, autocaravanas e outros elementos facilmente desmontables e transportables en zonas debidamente acondicionadas a tal efecto.

En caso de prestarse este servizo, a zona de depósito deberá identificarse no proxecto presentado para solicitar a autorización de apertura do campamento de turismo ou comunicarse mediante a correspondente comunicación previa se se pretendese habilitar con posterioridade á apertura.

3. O peche dentro do período de funcionamento deberá ser comunicado no prazo dos 15 días seguintes a que se produza, indicando a súa causa e duración. Cando este exceda de nove meses, producirá a baixa do establecemento no Rexistro de Empresas e Actividade Turísticas.
4. Así mesmo, previa instrución do oportuno procedemento no que se oír á persoa interesada, a Administración turística tramitará de oficio a baixa do establecemento cando comprobe a súa inactividade dentro do período de funcionamento comunicado.
5. En ambos casos, a reanudación da actividade esixirá da solicitude dunha nova autorización nos termos regulados neste decreto.

Artigo 28. *Seguro de responsabilidade civil*

1. Os campamentos de turismo deberán ter en vigor un seguro de responsabilidade civil durante todo o tempo que a actividade estea en funcionamento.
2. A cobertura do dito seguro deberá alcanzar aos danos corporais, materiais e a os prexuízos económicos que se poidan derivar do desenvolvemento da actividade.

Artigo 29. *Información*

1. A recepción do campamento de turismo constituirá o centro de encontro coa clientela a efectos administrativos e de reunión.
2. Na recepción expóranse os seguintes documentos, que deberán poder ser consultados libremente polos usuarios:

- a) Autorización de apertura e clasificación turística, expedida pola Axencia de Turismo de Galicia, o aforo e os símbolos de calidade normalizados.
 - b) Período anual de funcionamento.
 - c) Plano de campamento, no que conste a situación e os límites de cada unha das parcelas, así como a numeración correspondente e a situación dos diferentes servizos.
 - d) Lista de prezos dos diferentes servizos.
 - e) Certificado de que a auga no punto de entrega ás persoas consumidoras é apta para o seu consumo ou, no seu caso, indicación de que a auga do campamento conta con abastecemento a través da rede municipal.
 - f) Información dos horarios de funcionamento dos distintos servizos e o horario de descanso e silencio, que terán unha duración mínima de oito horas, dentro do período comprendido entre as 23.00 horas e as 09.00 horas.
 - g) Aviso da existencia de follas de reclamación de turismo a disposición da clientela.
 - h) Réxime de uso de servizos e instalacións e, no seu caso, o regulamento de réxime interior.
 - i) Plano de situación dos elementos de seguridade contra incendios e rutas de saída do campamento de turismo no caso de emerxencia.
3. Ademais do anteriormente sinalado, na recepción deberá estar:
- a) O rexistro de entradas e saídas de clientes a disposición dos membros das Forzas e Corpos de Seguridade do Estado con competencias na materia.
 - b) O libro de visitas da inspección turística a disposición dos inspectores de turismo.

CAPÍTULO V

Clasificación e especialidades

Artigo 30. Clasificación

1. Os campamentos de turismo clasifícanse, de conformidade co establecido no artigo 66.3 da Lei 7/2011, do 27 de outubro, do Turismo de Galicia, en cinco categorías: cinco estrelas, catro estrelas, tres estrelas, dúas estrelas e unha estrela.

2. A inclusión en cada unha das categorías sinaladas efectuarase en función das instalacións, equipamentos e servizos ofertados conforme ao anexo I.

Artigo 31. *Requisitos de clasificación*

De conformidade co disposto nos artigos 40 e 45 da Lei 7/2011, do 27 de outubro, do turismo de Galicia, a clasificación dos campamentos de turismo na forma prevista no artigo anterior realizarase segundo os requisitos mínimos que se indican no anexo I e manteranse en tanto perduren e se conserven en bo estado de uso as instalacións e servizos que xustificaron a mesma podendo, en todo caso, ser revisados de oficio ou a instancias da persoa interesada.

Artigo 32. *Especialidades*

1. Todo campamento de turismo deberá estar incluído nalgunha das categorías fixadas neste decreto. Non obstante, en base á prestación de servizos específicos ou á existencia de determinadas instalacións, o establecemento poderá solicitar e obter, ademais, da Axencia de Turismo de Galicia, o recoñecemento dalgunha das especialidades que se recollen neste decreto.

As ditas especialidades identificaranse mediante un distintivo único que deberá figurar xunto ao correspondente á categoría do establecemento.

2. Recoñécense as seguintes especialidades:
 - a) Campamento de turismo verde
 - b) Campamento de turismo temático
 - c) Campamentos para caravanas e autocaravanas

Artigo 33. *Campamento de turismo verde*

Recibirán o distintivo de campamento de turismo verde aqueles que contén con algunha das seguintes certificacións:

- a) Certificación baixo a norma UNE 184001:2007 Campings e cidades de vacacións ou norma que a substitúa.
- b) Acreditación de ter concedida a etiqueta ecolóxica da UE aos servizos de campamento de turismo, ao amparo do disposto no Regulamento (CE) nº 66/2010 do Parlamento Europeo e do Consello do 25 de novembro de 2009 relativo á etiqueta ecolóxica da UE (LCEur 2010,91).
- c) Ter concedida polo Instituto para a Calidade Turística Española a marca de calidade turística española; marca “Q” a campamentos de turismo.

- d) Contar, de acordo co Regulamento (CE) nº 1221/2009 do Parlamento Europeo e do Consello de 25 de novembro de 2009 (LCEur 2009, 2029), coa implantación do sistema comunitario de xestión e auditoría medioambiental e a inscrición no rexistro EMAS.
- e) Certificación baixo norma UNE-EN ISO 14001:2004 Sistemas de xestión ambiental ou norma que o substitúa.

Artigo 34. *Campamento de turismo temático*

- 1. Os campamentos de turismo cuxas instalacións e servizos, ou normas de uso, respondan a un tema ou materia específicos que os identifique e diferencie do resto de establecementos, tipo cultural, deportivo ou calquera outra circunstancia, poderán obter a especialidade de campamento de turismo temático.
- 2. Os campamentos de turismo que obteñan a especialidade deberán especificar, claramente, na súa publicidade e demais soportes de comunicación, a temática que os identifique, sobre todo cando implique unhas normas de uso que leven consigo condicións especiais para o goce das súas instalacións.

Artigo 35. *Campamento de turismo para caravanas e autocaravanas*

- 1. Son os campamentos de turismo que están reservados para uso exclusivo destas e de vehículos análogos, estando prohibida a instalacións nas mesmas de calquera tipo de tendas de campaña ou instalacións fixas ou móbiles para o aloxamento de persoas usuarias.
- 2. Quedan excluídas deste tipo de campamentos de turismo as zonas especiais de acollida para caravanas e autocaravanas en tránsito ás que se refire o artigo 66.5 da Lei 7/2011, do 27 de outubro, cuxa regulación corresponderá á administración local onde se sitúen, nas que o tempo máximo de estancia estará limitado a unha noite.
- 3. Os campamentos para caravanas e autocaravanas deberán contar con subministro de auga potable, tratamento e evacuación de augas residuais, subministro eléctrico e recollida de lixo en termos análogos aos previstos neste decreto con carácter xeral para os campamentos de turismo.
- 4. Ademais, e atendidas a súas especiais características, deberán contar con:
 - a) Servizo de vixilancia permanente do establecemento adaptado a súa extensión e capacidade.
 - b) As instalacións necesarias para que as persoas usuarias poidan evacuar e reaprovisionar os depósitos correspondentes do vehículo en proporción de, polo menos, un punto limpo por cada 40 parcelas ou fracción, para o tratamento de residuos, consistente nun sumidoiro accesible para o baleirado do depósito de augas usadas e dos residuos biolóxicos de váter, e nun elemento para o subministro de auga para a súa limpeza.

Ademais, e na mesma proporción, deberán dispor de billas de auga potable para o enchido do depósito da auga.

5. Así mesmo deberán contar cos seguintes servizos para as persoas usuarias:

- a) Máquina expendedora de bebidas ou vending.
- b) Lavabos independentes para homes e mulleres, a razón de un por cada 20 prazas de aparcamento ou fracción de que dispoña o establecemento.
- c) WC independentes para homes e mulleres, a razón de un por cada 20 prazas de aparcamento ou fracción de que dispoña o establecemento.
- d) Duchas independentes para homes e mulleres, a razón de unha por cada 20 prazas de aparcamento ou fracción de que dispoña o establecemento.
- e) Servizo de auga quente nas duchas e lavabos.
- f) Tomas de corrente xunto aos lavabos.
- g) Servizos hixiénicos para persoas con discapacidade.

CAPÍTULO VI

Réxime sancionador

Artigo 36. Infraccións e sancións

Os incumprimentos do disposto neste decreto serán sancionados de conformidade coa Lei 7/2011, do 27 de outubro.

Disposición adicional primeira. Datos de carácter persoal

De conformidade coa Lei orgánica 15/1999, do 13 de decembro, de protección de datos de carácter persoal, os datos persoais recollidos na tramitación de esta disposición, cuxo tratamento e publicación autoricen as persoas interesadas mediante a presentación das solicitudes, serán incluídos nun ficheiro denominado “Rexistros” cuxo obxecto é xestionar o presente procedemento, así como para informar ás persoas interesadas sobre o seu desenvolvemento. O órgano responsable deste ficheiro é a Axencia Turismo de Galicia. Os dereitos de acceso, rectificación, cancelación e oposición poderán exercerse ante esta Axencia, mediante o envío dunha comunicación ao seguinte enderezo: secretaria.turismo@xunta.gal

Disposición adicional segunda. Modificación de formularios

Co obxectivo de manter adaptados á normativa vixente os formularios vinculados a normas reguladoras de procedementos administrativos de prazo aberto, estes poderán ser actualizados na sede electrónica da Xunta de Galicia, sen necesidade de publicalos novamente no Diario Oficial de Galicia, sempre que a modificación ou actualización non supoña unha modificación substancial destes. Por conseguinte, para a presentación das solicitudes será necesario utilizar os formularios normalizados, dispoñibles na sede electrónica da Xunta de Galicia, onde estarán permanentemente actualizados e accesibles para as persoas interesadas.

Disposición adicional terceira. *Modelos normalizados*

A sede electrónica da Xunta de Galicia ten a disposición das persoas interesadas unha serie de modelos normalizados dos trámites máis comunmente utilizados na tramitación administrativa, que poderán ser presentados electronicamente accedendo á carpeta do cidadán da persoa interesada, ou presencialmente en calquera dos lugares e rexistros establecidos na normativa reguladora do procedemento administrativo común.

Disposición transitoria primeira. *Réxime transitorio dos expedientes*

Os expedientes en curso á data de entrada en vigor deste decreto, tramitaranse e resolveranse conforme ás disposicións vixentes no momento da súa iniciación.

A estes efectos consideraranse expedientes en trámite aqueles nos que se emitira informe potestativo e se solicite a autorización dentro do seu prazo de vixencia.

Disposición transitoria segunda. *Campamentos autorizados á entrada en vigor deste decreto*

1. Os campamentos de turismo debidamente autorizados á entrada en vigor deste decreto poderán seguir funcionando sen necesidade de adaptarse ás prescricións do mesmo, salvo as relativas á seguridade.
2. Non obstante, dentro do prazo de cinco anos, deberán axustarse ás categorías establecidas neste decreto. A estes efectos deberán dirixir a correspondente instancia á Axencia Turismo de Galicia e solicitar, de forma xustificada, a súa clasificación nalgunha das categorías fixadas neste decreto, que deberá ser resolta no prazo de seis meses.
3. Os campamentos de turismo aos que se refire a presente disposición transitoria deberán adaptarse integramente ao contido do decreto cando pretendan un cambio de categoría ou a realización de obras substanciais de ampliación ou rehabilitación que afecten á clasificación do campamento.

4.

Disposición transitoria terceira. *Dispensas para campamentos autorizados á entrada en vigor deste decreto*

1. Non obstante a obriga que con carácter xeral se establece de que os campamentos de turismo en funcionamento á entrada en vigor deste decreto se adapten integramente ao seu contido, no momento en que pretendan un cambio de categoría ou a realización de obras substanciais de ampliación ou rehabilitación que afecten á clasificación, os seus titulares poderán

solicitar, con carácter excepcional, a dispensa do cumprimento dalgunha ou dalgunhas das condicións esixidas no mesmo no momento no que procedan a adaptarse as súas esixencias cando concorran circunstancias que así o xustifiquen, como poden ser a insularidade ou a especial orografía.

2. A dispensa só poderá ser outorgada previa petición da persoa interesada, que deberá acompañar dunha memoria xustificativa das razóns polas que se solicita a dispensa do cumprimento dun ou varios dos requisitos establecidos con carácter xeral para os campamentos de turismo e as medidas alternativas ou compensatorias que se propoñan.
3. A resolución sobre a concesión ou denegación da dispensa corresponde ao órgano competente para a autorización do campamento de turismo, previo informe dos servizos técnicos correspondentes sobre os impedimentos ou dificultades para cumprir a condición ou condicións respecto dos que solicita a dispensa e a suficiencia das medidas complementarias e alternativas propostas para compensala.

A resolución deberá ser, en todo caso, motivada, podendo, a tal efecto, partir da valoración conxunta das instalacións, servizos e melloras que se incorporen en compensación a aquelas condicións respecto de cuxo cumprimento se solicita a dispensa.

Disposición derogatoria única. *Derrogación normativa*

Queda derogado o Decreto 144/2013, do 5 de setembro, polo que se establece a ordenación dos campamentos de turismo en Galicia, así como todas aquelas disposicións de igual ou inferior rango que se opoñan ao previsto neste decreto.

Disposición final primeira. *Desenvolvemento normativo*

Habilitase á persoa titular da Consellería de Presidencia, Administracións Públicas e Xustiza para o desenvolvemento das disposicións contidas neste decreto.

Disposición final segunda. *Entrada en vigor*

Este decreto entrará en vigor aos 20 días da súa publicación no Diario Oficial de Galicia.

Santiago de Compostela a de de 201

Alberto Núñez Feijóo
Presidente

Alberto Rueda Valenzuela
Vicepresidente e Conselleiro de Presidencia, Administracións Públicas e Xustiza

ANEXO I

ESTRELAS		5 *****	4 *****	3 ***	2 **	1 *
Prazas	Superficie mínima por persoa en zona de acampada	23 m2	20 m2	18 m2	16 m2	14 m2
Parcelas	Delimitación das parcelas	Separadas por sebes, pantalla vexetal ou outros elementos que faciliten a intimidade	Separadas por sebes, pantalla vexetal ou outros elementos que faciliten a intimidade	Separación con fitos ou marcas	Separación con fitos ou marcas	Separación con fitos ou marcas
	Parcelas con conexión de subministro eléctrico	75%	50%	35%	25%	10%
	Tomas de auga apta para consumo	1/80 prazas	1/90 prazas	1/100 prazas	1/110 prazas	1/120 prazas
Viarios interiores	Compactado	Compactado e asfaltado, con sistema de drenaxe	Grava miúda ou similar	Grava miúda ou similar	Grava miúda ou similar	Grava miúda ou similar
Aseos, non incluídos nas cabanas, casas móbiles ou bungalós (as reservas son sempre de un para homes e outro para mulleres)	Lavabos auga quente muller/home	1/24 prazas	1/32 prazas	1/40 prazas	1/45 prazas	1/50 prazas
	Duchas independentes, con porta, espazo para vestidor e auga quente Separación muller/home	1/30 prazas	1/40 prazas	1/45 prazas	1/50 prazas	1/60 prazas
	Inodoros independentes con porta. Separación muller/home	1/20 prazas	1/30 prazas	1/40 prazas	1/45 prazas	1/50 prazas

Requisitos dos equipamentos

En función da categoría, os equipamentos deberán cumprir os seguintes requisitos:

ESTRELAS	5*****	4****	3***	2**	1*
Piscina exterior	Si	Si	Non	Non	Non
Piscina climatizada	Si	Non	Non	Non	Non
Parque infantil	Si	Si	Non	Non	Non
Salón de lecer ou xogos	Si	Si	Non	Non	Non
Instalacións deportivas	Si	Si	Non	Non	Non
Fontes ou puntos de toma de auga apta para o consumo a menos de 100 metros de cada parcela	Si	Si	Si	Si	Non
Lavadoras automáticas	Si	Si	Non	Non	Non
Lavalouzas	Si	Non	Non	Non	Non
Secadoras e ferro	Si	Si	Non	Non	Non
Escurrodoiros 75% con auga quente	1/60 prazas	1/60 prazas	1/70 prazas	1/75 prazas	1/80 prazas
Lavadoiros 75% auga quente	1/65 prazas	1/65 prazas	1/60 prazas	1/70 prazas	1/75 prazas

Requisitos dos servizos

En función da categoría, os servizos deberán cumprir os seguintes requisitos:

ESTRELAS	5*****	4****	3***	2**	1*
Restaurante	Si	Non	Non	Non	Non
Cafetería/Bar	Si	Si	Si	Non	Non
Bar	Non	Non	Non	Si	Non
Máquina expendedora de comida/bebida	Non	Non	Non	Si	Si
Supermercado	Si	Si	Non	Non	Non
Tenda de venda produtos primeira necesidade	Non	Non	Si	Si	Si
Internet	Ordenadores con conexión a Internet e áreas de conexión inalámbrica	Ordenadores con conexión a Internet e áreas de conexión inalámbrica	Conexión a Internet	Conexión a Internet	Conexión a Internet
Programa de animación	Si	Si	Non	Non	Non
Servicio de gardería	Si	Non	Non	Non	Non